



2014KO APIRILAREN 15EKO
EZ-OHIKO OSOKO BILKURA

Lazkaoko Udaletxean, bi mila eta hamalauko apirilaren hamabostean, iluntzeko zazpi eta erdietan, Lazkaoko Udal Osoa biltzen da, aurrez honetarako deialdia egin delarik, Azeari Andonegi Beristain Alkatearen lehendakaritzapean, ez-ohiko batzarraldia egin asmoz.

Bertaratutako zinegotziak honako hauek dira: Kepa Goenaga Alikostes, Haizea Mendia Iztueta, Joseba Imanol Aran Barandiaran, Maialen Aldasoro Aranburu, Maria Aranzazu Bengoa Gorosabel, Urtzi Iruin Arruti, Patxi Albisu Estensoro, Ane Irastortza Izagirre, Inazio Estensoro Eskisabel, eta Juan Manuel Serna Portugal.

Milagros Madrazo Rada eta Felix Urkola Iriarte zinegotziak ez dira bertaratu.

Idazkari lanetan Iñaki Eskisabel Zurututzak dihardu.

Alkateak bilkurari hasiera eman ondoren, eguneko gai zerrendako gai bakarra eztabaidatzeari ekitzen zaio.

I.- 2014KO ABERRI EGUNA.-

2014ko aberri egunaren inguruan Bildu eta EAJk adostutako mozioa aurkezten da bere onarpenerako.

Mozioak honela dio:

"Aturritik Ebrora eta Enkarterrietatik Añamendira, Pirinioetako bi aldeetan 685 udalerritan bizi garen 3 milioi euskal herritarren gehiengoak, gure hizkuntza, kultura, edo jatorria edozein izanik ere, Euskal Herritar gisa bizi nahi dugu. Gure eskubide zibil eta politiko barne, Nazioarteko Giza Eskubideen Aldarrikapen Unibertsaletik eratortzen diren eskubide guztien jabe bizi nahi dugu Euskal Herri osoan.

Baina hori, zoritxarrez ez da gaur guk pairatzen dugun errealitate politiko administratiboa. Euskal Herria estaturik gabeko herri bat da, eta gu, euskal herritarrok gure borondatearen gaineratik, ofizialki frantziarrak edo espainiarrak izatera beharturik gaude. Gure udalerriak 2 estatuetan sakabanaturik daude. Alde batetik, Ipar Euskal Herriko 159 udal Frantziako Errepublikako Akitania izeneko erregioaren Pirinio Atlantikoetako departamentuaren barruan daude, Biarnoarekin batera diluiturik, inolako aitortza politiko administratiborik gabe. Bestetik, Espainiako Erresuman administratiboki kokatzen dira beste 526 udal. Hurrenez hurren: 272 Nafarroako Foru Komunitate izeneko Autonomia elkargoan, 251 Euskadiko Autonomia Elkargoan, 2 Gaztela-Leongo Autonomia elkargoko Burgos Probintzian eta azken bat Kantabriako elkargo autonomoan.

Errealitate hori ez da Euskal Herritarrek libre eta demokratikoki erabaki egin duguna, gerra eta konkistaz beteriko historiaren ondorioa baizik. Errealitate hori era demokratiko batean aldatzeko, horretaz gain, Euskal Herriko udalek lan aitzindaria eta garrantzitsua egin



dute historikoki. XX. mendean adibidez, horren lekukoa da 1931. urteko Lizarrako estatutua, 1976. urteko Bergarako alkateen mugimendua .

XXI. mendea hastear zegoelarik Euskal Herriko udal eta Udal hautetsien Biltzarra, Udalbiltza, beste mugarri esanguratsua izan zen. Zeinek Euskal Herriaren nazio eraikuntza bultzatzea, prozesu dinamiko eta demokratiko gisa ulertzen zuen , eta Euskal herritar guztien erabakien eta partehartzea askean oinarritu behar zela zioen.

2014. urte honetan abagune berezia ari gara bizitzen. Begi bistan daude kontrako eta aldeko faktoreak. Alde batetik, nabaria da Espainia eta Frantziaren ezezko iraunkorra... Baina han daude ere Europako estatu berrien sorrera, Katalunia eta Eskoziaren autodeterminaziorako erreferendumak edo "gure esku dago" bezala, Euskal Herrian sortzen ari diren herri ekimen arrakastatsu berriak.

Horregatik, Euskal Herriaren egunaren bezperetan, Euskal Herritarren egunera hurbiltzen ari garenean, aurreko guztia aintzat hartuz, Lazkaoko udalak Aberri Egunerako ez ohiko osoko bilkura honetan, hurrengo adierazi nahi du:

- 1.- Euskal Herritarrak garelara adierazteko garaia heldu dela eta ozenki esan nahi dugulako, Euskal Herritartasunaren aldeko herri dinamika sortzeko eta sustatzeko deia luzatzea erabaki dugu.
- 2.- Kaleetan zein eraikuntza publiko eta partikularretan Euskal ikurrak jartzeko gonbidapena luzatzen dugu honen bidez. Zer ez garen baino, garena eta sentitzen duguna gure ikurriñaren bidez publikoki adierazteko gonbidapena luzatu nahi diogu herritar orori.
- 3.- Gure herriarekiko benetako bake eta bizikidetzat demokratikoa, elkarrizketaren , justiziaren, egiaren eta gure herriaren interes orokorraren bitartez landua izango dena, lortzea helburu duten ekimenei babes eskaintzen diogu.
- 4.- Egungo gizartearen elkarri zor diogun begirunetik, eta guztion ondare diren eskubide demokratikoengatik abiatuz, gure asmoa herritar askez osatutako aberri aske bat lortzea dela aitortuz, justizia soziala eta guztion aurrerabidea bermatuko duena, zer garen ulertzeko oroimen historikoa berreskuratzeko konpromisoa hartzen dugu. Herri bakar bat osatzera garamatzaten ezaugarri eta kultur ondare amankomuna aitortuz eta zainduz, horrekin batera herritar guztien ezaugarri eta eskubideak zainduko dituen gizarte aurreratu bat lantzeko etengabeko asmoa adieraziz.
- 5.- Independentziari buruz Etxarriko herriak apirilaren 13an burutu den herri kontsultari erabateko babes adierazi nahi diogu. Erabakitzeko eskubidearen ariketa demokratiko praktikotzat jotzen dugu eta zentzu honetan bere zilegitasuna aitortu nahi dugu.
- 6.- Zentzu berean eta arrazoi berdinegatik, "Gure esku dago" herri ekimenak ekainaren 8rako antolatu duen Iruñea eta Durangoren arteko giza katean parte hartzeko deia, eta oro har, "Gure esku dago" herri dinamikari erabateko babes adierazi nahi diogu."

Serna zinegotziak (PSE-EE) esaten du mozioaren aurka bozkatuko duela. Gehitzen du harrigarriak direla mozioan esaten diren hainbat gauza eta gehiago hitza nola erabiltzen den ere harrigarri egiten zaiola; esaten du baita ere gizartearen gehiengoaren kezka ez dela hau.



Estensoro zinegotziak (EAJ) Sernari erantzunez esaten dio beraientzat ere lana eta ekonomia direla lehentasun nagusiak baina aberri eguna iristen denean estadu bat errei-bindikatu egiten dutela nazionalista diren partetik, hau ere beraientzat garrantzitsua delako eta hori kontestualizatu egin behar dela.

Alkateak (Bildu) esaten du beraientzat garrantzitsua dela aberri eguna eta horrek ez duela kentzen bestearen garrantzia.

Guzti honen ondoren mozioa bozketan jartzen da eta Osoko Bilkurak, aldeko hamar botu (Bildu, EAJ) eta aurkako botu batez (PSE-EE) berau onartu egiten du.

II.- BILERAREN AMAIERA.-

Eta eztabaidatzeko beste gairik ez dagoenez, Alkateak bilera amaitutzat jotzen du, iluntzeko zortziak hamar gutxi direnean nik, Idazkariak, guztiaren akta jaso eta ziurtatzen dudalarik.

